

**POSLOVANJE „Elta-kabela“ d.o.o. DOBOJ -  
Preduzeća za prijenos zvuka, slike ili ostalih informacija kablovima  
za period 2005 – 2010. godine**

**I. Pravna osnova**

Institut za standarde, mjeriteljstvo i intelektualno vlasništvo Bosne i Hercegovine (*pravni prethodnik Instituta za intelektualno vlasništvo BiH*) Rješenjem broj IP-3905/06-04VL od 6.5.2006. godine izdao je „Elta-kabelu“ d.o.o. Doboj - Preduzeću za prijenos zvuka, slike ili ostalih informacija kablovima odobrenje za obavljanje djelatnosti ostvarivanja autorskog prava i prava radiodifuznih organizacija (u daljnjem tekstu: preduzeće „Elta-kabel“).

Preduzeće „Elta-kabel“ je upisano u sudski registar kod Osnovnog suda u Srpskom Sarajevu 23.3.2001. godine, a promjena sjedišta i naziva upisana je u registar kod Osnovnog suda u Doboju.

Osnivač i vlasnik preduzeća „Elta-kabel“ je Aco Kabanica, a direktorica Danka Jovović.

**II. Statut i organizaciona pitanja**

Prema Statutu, organi preduzeća „Elta-kabel“ su Skupština i Upravni odbor. Osnivač preduzeća obavlja poslove iz djelokruga Skupštine u skladu sa odredbama Zakona o preduzećima Republike Srpske. Direktora imenuje osnivač odlukom o imenovanju. Obaveze direktora su: organizira i vodi poslovanje Preduzeća, predstavlja Preduzeće, stara se o zakonitosti rada i odgovara za zakonito poslovanje.

**III. Stjecanje i raspolaganje imovinom**

Dobit preduzeća „Elta-kabel“ utvrđuje se i raspoređuje prema važećim propisima. Po izmirenju obaveza dobit se raspoređuje na dio za povećanje osnovnog kapitala, za rezerve, bruto lične dohotke i sredstva zajedničke potrošnje, te za investicije.

Gubitak preduzeća „Elta-kabel“ pokriva se iz sredstava koja se mogu koristiti za pokriće gubitka u skladu sa propisima. Gubitak se pokriva raspoloživim sredstvima rezervi, otpisom potraživanja od povjerilaca i na teret trajnih izvora sredstava.

Rizikom preduzeća „Elta-kabel“ smatraju se: neostvarivanje planiranog obima prometa, neostvarivanje ili djelimično ostvarivanje, odnosno neblagovremeno ostvarivanje naplate potraživanja, neracionalno korištenje rada i sredstava rada u vršenju djelatnosti, drugi nepredviđeni događaji koji prouzrokuju zastoj u vršenju djelatnosti.

Preduzeće odgovara za svoje obaveze cjelokupnom imovinom, a osnivač do visine svog uloga.

Novčani osnivački dio osnovnog kapitala društva sa ograničenom odgovornošću iznosi 5.000,00 KM. Sredstva za rad Preduzeća osigurava osnivač. Vrijednost uloga u stvarima iznosi 20.000,00 KM.

#### **IV. Izvještaj o poslovanju za period 2005 – 2010. godine**

U postupku nadzora nad radom organizacija za kolektivno ostvarivanje prava Institut za intelektualno vlasništvo Bosne i Hercegovine je preduzeću „Elta-kabel” uputio poziv da dostavi izvještaj o vođenju poslova za period 2005 – 2010. godine, te naložio da dostavi:

- naznaku prava koja ostvaruje;
- kopije punomoći autora i udruženja autorâ koji su ovlastili organizaciju za ostvarivanje njihovih prava;
- kopije ugovora sa korisnicima prema godinama;
- ukupno ostvarene prihode od korisnika iz BiH prema godinama;
- ukupno ostvarene prihode iz inozemstva na osnovi ugovora o recipročnom predstavljanju;
- iznose raspodijeljenih sredstava autorima i nosiocima prava prema godinama;
- iznose raspodijeljenih sredstava autorima iz inozemstva putem inozemnih kolektivnih organizacija;
- iznose sredstava za pokrivanje troškova rada organizacije prema godinama;
- plan poslovanja organizacije prema godinama;
- odluke nadležnog organa organizacije o usvajanju plana poslovanja prema godinama;
- finansijski izvještaj koji je usvojio nadležni organ prema godinama;
- revizorski izvještaj zajedno sa mišljenjem ovlaštenog revizora o pravilnosti poslovanja organizacije i njihove usklađenosti sa zakonom, aktima organizacije i ugovorima zaključenim sa trećim licima prema godinama;
- kopije sudskih i upravnih odluka u kojima je organizacija bila jedna od stranaka.

Izvještaj o poslovanju preduzeća „Elta-kabel” zaprimljen je 29.3.2011. godine. Uz izvještaj su dostavljene kopije ugovora sa AGICOA-om EBU (Evropska unija za emitiranje) i VG Media Gesellschaft o ekskluzivnom predstavljanju TV kanala za teritoriju Bosne i Hercegovine. Prema izvještaju, preduzeće „Elta-kabel” je 2004. godine potpisalo generalne licencne ugovore za kablovsku redistribuciju za kanale koje predstavljaju navedene organizacije sa 31 kablovskim operaterom u BiH.

Ugovor sa AGICOA-om je obnovljen 2005. godine na period od dvije godine. Nakon toga, obnovljeni su i ugovori sa AKOP-om - Asocijacijom kablovskih operatera BiH i 46 kablovskih operatera. Osim generalnog licencnog ugovora, sa AGICOA-om je potpisan i licencni ugovor za reemitiranje komercijalnih kanala. „Elta-kabel” je 2008. godine potpisao nove ugovore sa AGICOA-om i AKOP-om za naredne dvije godine.

#### **V. Finansijsko poslovanje**

Na osnovi **generalnog licencnog ugovora**, u periodu od 2005. do 2009. godine ukupna potraživanja iznose **2.683.000,50 KM**, a ukupno ostvareni prihod je **1.975.130,20 KM**.

Na osnovi **licencnog ugovora**, u periodu od 2005. do 2009. godine ukupna potraživanja iznose **1.053.913,63 KM**, a ukupno ostvareni prihod je **557.340,67 KM**.

Ukupan prihod prema godinama je kako slijedi:

**Tabela 1.** Prikaz ukupnih potraživanja i ostvarenog prihoda na osnovi **generalnog licencnog ugovora**

NAZIV KOLEKTIVNE ORGANIZACIJE	GODINA	UKUPNA POTRAŽIVANJA	OSTVARENI PRIHOD
„Elta-kabel” d.o.o. Doboj	2005.	224.791,43	224.782,10
	2006.	557.535,07	513.977,14
	2007.	635.339,14	555.278,63
	2008.	588.702,64	550.502,57
	2009.	676.630,22	130.589,70
	2010.		
	<b>Ukupno</b>	<b>2.683.000,50</b>	<b>1.975.130,20</b>

**Tabela 2.** Prikaz ukupnih potraživanja i ostvarenog prihoda na osnovi **licencnog ugovora**

NAZIV KOLEKTIVNE ORGANIZACIJE	GODINA	UKUPNA POTRAŽIVANJA	OSTVARENI PRIHOD
„Elta-kabel” d.o.o. Doboj	2005.	4.882,27	4.877,77
	2006.	22.216,89	20.483,70
	2007.	183.127,34	138.164,81
	2008.	475.777,62	288.838,38
	2009.	367.909,51	104.976,01
	2010.		
	<b>Ukupno</b>	<b>1.053.913,63</b>	<b>557.340,67</b>

Finansijski pokazatelji za 2010. godinu nisu dostavljeni.

U izvještaju se navodi da je raspoređeni iznos **1.883.069,74 KM**. Od toga je AGICOA na osnovi ugovora uplatila „Elta-kabelu” iznos od **247.246,66 KM**.

U istom periodu „Elta-kabel” je uplatio „Uzusu“ iznos od **36.100,00 KM**.

Zbog nekompletnosti podataka i dokumenata, Institut je ponovno uputio poziv za dopunu izvještaja sa relevantnim podacima o:

- bilansu stanja i uspjeha za traženi period prema godinama;
- iznosima raspodijeljenih sredstava autorima i nosiocima prava prema godinama (kako i kome su raspodijeljena sredstva);
- iznosima sredstava za pokrivanje troškova rada Preduzeća prema godinama (ukupan iznos i procenat u odnosu na ukupan prihod);
- planu poslovanja Preduzeća prema godinama;
- odluci nadležnog organa Preduzeća o usvajanju plana poslovanja prema godinama;
- finansijskom izvještaju koji je usvojio nadležni organ Preduzeća prema godinama;
- revizorskom izvještaju sa mišljenjem ovlaštenog revizora o pravilnosti poslovanja Preduzeća i njihovoj usklađenosti sa zakonom, aktima Preduzeća i ugovorima zaključenim sa trećim licima prema godinama;

- kopijama sudskih i upravnih odluka u kojima je Preduzeće bilo jedna od stranaka.

Na upućeni poziv preduzeće „Elta-kabel” je 25.5.2011. godine dostavilo dopis (broj UP-05517/11) u kojem navodi da je Preduzeće, **kao predstavnik AGICOA za BiH**, radilo na tehničkim pitanjima implementacije ugovora potpisanog za BiH, te da je finansijske poslove za Preduzeće direktno vodila služba AGICOA sa njihovog nerezidentnog računa. Zbog toga, osim provizije definirane ugovorom, u finansijskim izvještajima preduzeća „Elta-kabel” koje je tražio Institut u pozivu nema stavki koje su vezane za aktivnosti prema ugovoru sa AGICOA-om ili drugim ugovorima za ostvarivanje autorskih prava.

## **Z a k l j u č a k**

1. Analiza poslovanja preduzeća „Elta-kabel” ukazuje na to da je ovo preduzeće poslovalo kao zastupnik - agent inozemnih organizacija za koje nije potrebna dozvola za kolektivno ostvarivanje autorskih i srodnih prava.
2. Preduzeće „Elta-kabel” nije obavljalo poslove kolektivnog ostvarivanja prava za koje je dobilo dozvolu od Instituta, te nije moguće dati ocjenu poslovanja ovog preduzeća sa stajališta normi koje reguliraju kolektivno ostvarivanje autorskih i srodnih prava.
3. Imajući u vidu dosadašnje poslovanje preduzeća „Elta-kabel” i novi zakonski okvir, neophodno je preispitati da li ima potrebe da se Preduzeće bavi poslovima kolektivnog ostvarivanja autorskog prava.

[Kraj dokumenta]